



Uunga siunnersuut: Qalerallit avaleraasartuullu avataasiorluni aalisarnermi pisarineqartut akitsuutaat pillugit Inatsisartut inatsisaata allanngortinneqarnera pillugu Inatsisartut inatsisaat nr. x, xXx 2015-imeersoq (Aalisakkat ikerinnarsiortut ilaasa Tunumi pisarneqartut akitsuutaat)

(Aningaasaqarnermut Aatsitassanullu Naalakkersuisoq)

(Siullermeenera)

Uani eqqartorparput siunnersuut 2016-mi Aningaasanut Inatsimmut atatillugu ilaannakoortumik isumaqatigiissummut ilaasoq, Siumup Atassutip aamma Demokraatit isumaqatigiissutaannut.

Demokraatini aalajangiusimajuarsimavarput pisortat ingerlatsiviini sipaartoqarnissaa pitsanngorsaasoqarnissaalu aalajangisumassallutigit akitsuusersuinerit pinngitsoortikkumallugit. Isumaqatigiissuteqarnikkut qularnaarparput pisortat ingerlatsiviini ingerlaavartumik annikillilerisoqarnissaa aamma innuttaasunut qularnaarparput akissarsianut akileraartup uani qinigaaffimmi ingerlasumi qaffanneqassanngitsoq. Tamatuma saniatigut suleqataaffigaarput neqinut akitsuutip taamatullu ikummatissanut akitsuutip eqqunneqartussatut siunnersuutigineqaraluartut piviusunngortinngitsoornissaat. Tamanna perruulaarutigaarput.

Demokraatini nalunngilarput una siunnersuut Inuussutissarsiortuni kattuffinnillu isornartorsiorneqarnikuusoq - sualummik qaleralinnut suliarineqanngitsunut akitsuut eqqarsaatigalugu. Isornartorsiortut naalaarpagut aamma paasilluarpagut. Nassuerutigissavarput suliap ingerlarnga pitsaanagerusimasinnaagaluarpat, naggataatigullu inernerusoq pingaarnersoq aamma isumaqarpugut.

Isornartorsiunerit pissutigalugit partiit isumaqatigiissuteqartuusugut oqallippugut aamma Naalakkersuisut oqalliseqatigaagut tassungalu atatillugu isumaqatigiissutigaarput qalerallit suliarineqanngitsut avammut tunisassiarineqartut akitsuusernissaannut allamik aqqiissutissamik ujarliniarluta. Demokraatini tamanna nuannaarutigeqaarput, isumaqaratta qalerallit suliarineqanngitsut akitsuusernissaat pitsaanngitsoq.

Naalakkersuisut allannguutissatut siunnersuutaata arlalitsigut inuussutissarsiortut kattuffiillu kissaataat assigaat, taamaattumik taakku tapersiiumaartut neriuppugut.

Siunnersuutip Aningaasaqarnermut- Akileraartarnermullu Ataatsimiititaliami oqaluuserineqarnissaa innersuupparput.